



Centimetres

TIPPEN Color Control Patches

© The Tiffen Company, 2007



洛學編卷之五

博陵尹會一元

續編

大清

孫夏峯先生


先生諱奇逢字啓泰號鍾元直隸容城人明萬曆庚子舉於鄉國初遷居河南輝縣講學蘇門山遂為輝人屢徵不仕世號徵君先生少與定興鹿忠節公善繼為友以聖學相砥礪隨時隨處體認天理以倫常為本以慎獨為宗見義必為無所避就甫踰弱冠

洛學編

卷之五

一

有不為齋



連丁內外艱喪葬壹準古禮率兄弟廬墓凡六年學
使者李蕃以純孝聞命旌其門當天啓乙丙間逆閹
魏忠賢竊柄毒虐忠良大興鈎黨之獄桐城左公光
斗嘉善魏公大中吳縣周公順昌皆雅善忠節公亦
素重先生及左魏被逮時左之弟光明魏之子學泚
投兩家是時高陽孫公承宗以樞輔督師榆關忠節
公參贊軍事其父鹿太公正暨新城張果中與先生
同志爭出身營救先舍兩公子弟於鹿太公莊上先
生作書求救於孫公略云左魏諸君子清風大節必
不染指以庇罪人此何待言獨以善類之宗直臣之

首橫被奇冤自非有胷無心誰不扼腕維桑與梓固
浮邱舊履地也遺愛在人不止門墻之士興歌黃鳥
昔盧次榎一莽男子耳謝茂秦以眇布衣行哭於燕
市謂元美等曰諸君子不生爲盧生地乃從千載下
哀湘而弔賈乎李獻吉在獄何仲默致書楊遠菴求
爲引手康德涵義激同調至不自愛其名浮邱廓園
之品固當直踞獻吉何次榎敢望某無能哭訴尙負
慚於茂秦閣下功德前無遠菴憐才扶世之感稍一
引手且有出德涵上者況諸君子以道義臭味之雅
受知於閣下最深且久豈無意乎孫公得書輒具疏

請人覲面陳關門機事忠賢聞之遶御牀而泣謂將
清君側熹宗詔止於途遂坐左魏以賊各累千萬榜
追之先生與鹿正張果中謀贖金輸納炎蒸跨一驢
奔走數百里外各得金數百齎送都門而兩公已俱
先斃於杖越一年周公又以檻車被逮擬贓五千先
生復爲謀畫得數百餘金而周又杖斃矣是時逆燄
方張諸公素所交游皆搖手鍵戶噤不敢發聲獨先
生忠義所激奮不顧身人皆爲先生危之而卒免於
禍三公遺骨藉以歸里是以海內有范陽三烈士之
稱先生與鹿正張果中也保母客氏與忠賢表裏爲

奸其弟光先藉勢傾結士大夫一時蟻附者恐後屢
招致先生不得介所知餽名馬先生固卻不受孫公
將薦先生於朝其客茅元儀爲先生言之先生固辭
而止御史黃宗昌禮科給事中王正志成薦先生可
大用俱不赴歲丙子兵薄容城先生率兄若弟及族
黨俱入城鄰邑相依者數十百家有司紳士分城而
守而先生獨領西北隅雉堞久圯未築而兵突至先
生隨禦隨築鄰邑多陷而容城巋然獨存巡撫都御
史張其平上其事詔優秩擢用會南都大司馬范公
景文亦以軍務馳聘先生俱辭不赴時烽烟四警城

堡殘破先生率子弟門人入易州之五公山族黨相
依者愈衆先生飭戎器練鄉兵厲人心儲糗糒爲守
禦計暇則敦詩習禮於干戈搶攘時隱然有太平揖
讓之風 國朝定鼎以病瘍屢徵不起因田廬充采
地僑居於衛慕蘇門百泉之勝遂家焉率子孫躬耕
自給弟子日進而睢州湯公潛菴出其門先生講學
不立門戶能通朱陸兩家之畛域又樂易近人不繩
人以難行之事故見者服其誠信聆其議論無不信
聖賢之可爲上自公卿大夫以及田氓野老有就先
生相質先生披衷相告弗吝也天性孝友讀父書觸

手澤輒涕零逢忌日慘容蔬食終身如一故人子弟
貧不能自存者推解無倦色而成人之美完人之節
力持風化老而彌篤所著有四書近指讀易大旨尙
書近指理學宗傳家禮酌歲寒居答問孝友堂家規
畿輔人物考中州人物考取節錄諸書行於世卒時
年九十有二葬輝縣子孫五世遶膝者三十餘人

尹會一日先生之學或以兼通陸王爲疑然考其
生平隨時隨事體認天理而功歸慎獨遊其門者
高明沉潛成德達材如羣飲於河各充其量蓋有
非一曲所能測其涯涘者至周旋左魏諸公之難

壹似氣節之爲而卒遠於禍觀其在白溝邂逅浮
邱語閭閻心氣和平雖緹騎環伺莫能乘其隙毋
亦見其大則心泰而誠至則物自無忤焉者乎然
則先生之養可知矣

湯潛菴先生

先生諱斌字孔伯號潛菴睢州人八九歲時聽里中
耆儒王慕祥講小學退卽習儀節徵實行慕祥異之
年十六就傅郭外值流寇陷州城母趙氏罵賊死先
生痛徹心骨益自刻苦後避亂三衢山中每中夜讀
書忽有所觸輒痛哭悲號聲振林谷哭已復讀山中
人咸哀之亂定歸里門順治戊子舉於鄉己丑會試
中式壬辰成進士館選庶吉士扃戶無所造謁甲午
授國史院檢討時方議修明史先生疏言宋史修於
元至正而不諱文天祥謝枋得之忠元史修於明洪

武而亦並列了好禮普顏不花之義前明抗節死事諸臣似未可槩以叛書 詔嘉論之乙未簡翰林科道出任監司先生得陝西按察使副使備兵潼關於是王師方不滇蜀潼關當孔道征調旁午民率竄走山谷先生與帥約資糧屨供如部符外不得稍溢帥肅隊帖然過境李廷玉者贛州巨寇也贛爲四省上游崇山深箐賊伏戎於莽有年先生自潼關擢江西參政分守嶺北設計擒獲而地方以寧後以父老乞歸里昕夕色養益沉酣性命之學渡河至夏峯受業於孫鍾元先生所學愈益日進居家二十年踐履

篤實涵養純粹褻然推一代巨儒當湖陸稼書以先生不欲詆斥陽明致書辨論學術甚力後得先生書語人曰余書是孟子好辨章意潛菴來書是孟子反經章意終亦不復有所牴牾云戊午 詔舉博學宏詞魏總憲金副憲交章共薦 御試甲等授翰林院侍講尋轉侍讀出典浙試稱得士還充明史總裁官既又直經筵每入講必沉思積誠以感動嘗於書義之外推明時政都無忌諱同列爲先生震恐先生自若也甲子擢內閣學士兼禮部侍郎遂以右副都御史巡撫江蘇蒞任後正己率屬問民疾苦禁侈靡興

教化凡諸便民者皆奏請行之見屬吏必反覆丁寧告以持身行政忠君愛民之義數月効其不奉令者由是吏治肅清月吉講 聖諭又定期集生徒講孝經小學習俗爲之一變丙寅春 特晉禮部尚書掌詹事府詹事以輔導青宮先生聞 召卽行吳民送者十餘萬人其轉移風俗成效畧具毀淫祠一疏中疏曰臣才具庸劣奉 命撫吳 陛辭之日蒙我皇上諄諄誨諭以移風易俗爲先務

聖駕南巡又諭以敦本尙實使民還淳返樸臣仰承德意月吉齊士民講解 上諭十六條又定期至學

宮講孝經小學使人知重倫常而敦實行一年以來風俗亦漸改觀竊以吳中之俗尙氣節而重文章闡闡詩書以著述相高固天下所未有也但其風俗淫靡黠者藉以爲利而愚者墮其術中爭相倣倣無所底止如婦女好爲冶遊之習靚粧艷服連袂僧院或羣聚寺觀裸身燃臂虧體誨淫至於斂錢聚會迎神賽社一旛之直可數百金刻造賭具編作淫詞流傳天下壞人心術婚喪不遵家禮戲樂參靈綵服送喪仁孝之意衰任卹之風微矣而無賴少年教習拳勇身刺文繡輕生好鬪名爲打降如此之類不可枚舉

臣皆嚴加禁飭委曲告誡今寺院無婦女之跡河下無管絃之聲迎神罷會艷曲絕編打降之輩亦稍稍斂迹若地方有司守臣之法三年之後可以返樸還淳且浮費簡則賦斂足禮樂明則爭訟息固吳中之急務也然此皆地方官力所能行不敢上煩 諭旨惟淫祠一事挾禍福之說年代久遠人人膏肓非奉天語申飭不能永絕根株蘇松淫祠有五通五顯五方賢聖諸名號皆荒誕不經而民間家祀戶祝飲食必祭妖邪巫覡創爲怪誕之說愚夫愚婦爲其所惑牢不可破蘇州府城西十里有佻伽山俗名上方

山爲五通所踞幾數百年遠近之人奔走如騖牲牢酒醴之饗歌舞笙簧之聲晝夜喧闐男女雜遝經年無時間歇歲費金錢何止數十百萬商賈市肆之人謂稱貸於神可以致富借直還債祈報必豐里諺謂其山曰肉山其下石湖曰酒海耗民財蕩民志此爲最甚更可恨者凡少年婦女有殊色者偶有寒熱之證必曰五通將娶爲婦而其婦女亦恍惚夢與神遇往往羸瘵而死家人不以爲哀反艷稱之每歲常至數十家視河伯娶婦之說更甚矣夫蕩民志耗民財又敗壞風俗如此

皇上治教如日中天豈容此淫昏之鬼肆行於光天化日之下臣多方禁之因臣以勘災至淮益肆猖獗臣遂收取妖像木偶者付之烈炬土偶者投之深淵檄行有司凡如此類盡數查毀撤其材木備修學宮葺城垣之用民始而駭繼而疑以爲從前曾有官長厭其妖妄銳意除之神卽降之禍殃皆爲臣危之數月之後見無他異始大悟往日之非然吳中師巫最黠而悍誠恐臣去之後必又造怪誕之說箕歛民財更議興復愚民無知必復舉國若狂不可禁遏請賜特旨嚴禁勒石山巔令地方官加意巡察有敢興

復淫祠者作何治罪其巫覡人等盡行責令改業勿使邪說誑惑民聽 天威所震重寐當醒人心旣正

風俗可淳更通行各直省凡有類此者皆行禁革有裨世道豈渺小哉 上嘉納之蘇松兩府賦役繁重


自有明已然實爲三百年以來之痼疾先生籲請寬減另定科則格於部議未及准行至於改徵積欠爲分年豁免蘆課版荒捐前明神廟所加九釐餉減淮揚徐諸州縣水災正供寬逃丁甦驛困諸事不憚再三八告當先生之內召也 上眷注愈隆先生思所


以報主者愈切凡會議大事 上必問湯斌云何先

生正論諤諤不顧利害天下方仰望風采而忌之者亦衆旋調工部尚書丁卯卒嗚呼以仁廟之聖先生之賢君臣遇合千載一期雖傾軋者百端而終不能搖動豈非大儒之效歟所著有洛學編四卷睢州志五卷明史稿二十卷並詩文二百餘篇藏於家乾隆元年賜謚文正遣官致祭復御製碑文樹於墓道以表之

尹會一曰先生忠孝性成篤志聖學躬實踐不慕高遠或勸之著書曰學貴日新今日之所是異日未必不以爲非何敢妄作有味哉先生之言也

士不剛健篤實而先耀其采可乎所著諸書皆不得已而後言若其居官奏疏乃先生經國訂謨以布優優之政者忠肝古誼余嘗莊誦而如見之





耿逸菴先生


先生諱介字介石號逸菴登封人初名冲壁一日讀
北山移文至耿介拔俗之句遂更今名順治辛卯舉
於鄉壬辰成進士由檢討出爲福建巡海道時海洋
多奸宄出沒先生相度形勢壘築石城一道以防寇
盜除積弊革冗費戒貪墨恩威大著康熙壬寅轉江
西湖東道因改官制除直隸大名道直隸旗逃之案
株逮者多一案牽引至三四十人先生在任將及期
年計三百餘案不肯蔓延無辜一人民咸感之丁內
艱回籍遂絕意仕進詣蘇門執贄於孫夏峰先生篤

志躬行慨然以倡明絕學爲己任興復嵩陽書院適
長洲張爨如爲登封令合志振興來學者衆士風蒸
起嗣以宗伯湯潛菴先生薦授少詹任輔導未幾疾
作乞休歸里復理書院之業日孜孜以講學爲事湯
文正稱先生賦質剛方踐履篤實服官冰蘖自矢家
居淡泊自甘潛心經傳學有淵源老成夙素罕見其
儔君子之道人善寧有溢美哉所著有理學要旨孝
經易知中州道學編敬恕堂存稿行於世

張仲誠先生

先生諱沐字仲誠上蔡人登順治戊戌進士授內黃
令爲治重農桑務教化自正供外裁革羨耗壹意與
民休息令家各書爲善最樂四字於門以相提警註
六論敷言皆戶曉之朔望集諸生講學於明倫堂懇
切諄復環而聽者罔不聳動在官五年以事去有薦
之者又起爲四川資縣令治資悉如治內黃一載告
歸與夏峰孫徵君遊潛心默悟力任斯道主講游梁
書院學規釐然門人循之有實效晚年闢白龜圃以
教授四方學者所著有五經疏畧圖書秘典學道六

書學者稱爲上蔡夫子云



張敬菴先生

先生諱伯行字孝先號敬菴儀封人康熙乙丑進士
官中書丁外憂家居越三年建請見書院於邑之西
郊與鄉人講明正學巳卯夏大雨儀封北關隄決水
淹城先生寡人夫囊沙土填築得無患總河張鵬翮
薦赴河工以勞績屢著遷山東濟東道值歲荒 詔
加賑卹憲檄猶未及下先生遽動倉穀數萬石給汶
上陽穀等縣饑民將挂彈章先生怡然曰爲民鑄官
吾何愧焉恐山東官吏皆以某爲戒矣事亦旋寢遷
江蘇按察使丁亥

聖祖南巡以先生爲江南第一清官超擢福建巡撫至則置社倉毀淫祠褒廉吏糾貪墨訪猾隸奸胥寘諸法教化大行閩故爲理學藪乃建鰲峰書院列學舍百二十楹祀有宋諸賢選士肄業親勗諸生以明體達用之學在閩三載政聲日上遂移撫江蘇是時兩江總督噶禮氣餒赫奕性更貪橫先生不名一錢直己守道凡有興革舉劾動輒齟齬因以疾辭不許辛卯秋江南鄉試科場弊發先生廉其實具奏

聖祖遣重臣二人鞠之詞連噶禮禮力持其事使者蓄縮不敢問先生毅然上疏劾督臣噶禮平日營私壞法穢迹彰聞及通同考官爲奸利相庇護狀請卽行解任一併研審噶禮亦誣先生他事馳奏先生遂與噶禮俱奪職對簿案歸獄於先生擬褫職治罪噶禮得不問下部議覆亦如之


聖祖別遣兩重臣覆按如初下部議覆又如之聖祖特下詔曰張伯行居官清正天下兒童婦女所共知也此議是非顛倒着九卿詹事科道會同矢公確議具奏於是九卿不敢主前議猶兩持之


聖祖復諭曰治天下要於至公朕臨御五十年諸事以公心處之張伯行清廉天下所共知也噶禮操守

朕不能信微伯行在彼江南腴削半矣語云文官不愛錢武官不惜命然後天下又安朕自幼讀書研窮性理如此清官朕不爲保全則讀書數十年何益而凡爲清官者何所賴以自安乎朕初遣官往審爲噶禮所制再遣亦爲所懼汝等既係大臣知張伯行清廉當會議時何竟無一言及朕有諭旨方言其清晚矣汝等體朕保全清官至公之意使正人無所畏忌則海宇長亨昇平之福矣翼曰 命先生復任噶禮革職其餘正法有差先生之解官也江南士民如失慈父母奔走號呼遮道請畱者以數萬計及 命下

歡動若雷各榜其門曰聖明天子焚香以祝篆焰凝結衢巷間先生建紫陽書院集諸生講濂洛關閩之學其規模次第畧如在閩時已而 詔遣使者審海案使者劾先生狂妄自矜請褫職嚴訊疏七上乃許讞成擬大辟封車至京 聖祖曰此人朕固當用之命署總督倉場侍郎尋管理錢法授戶部右侍郎仍兼倉場事 世宗卽位遷禮部尙書乙巳以疾卒於位追贈太子太保諡清恪所著有困學錄二十四卷續困學錄二十四卷正誼堂文集四十卷續集十卷居濟一得五卷行於世至於纂言之書凡數百卷其

五十餘種皆以朱子爲宗不稍惑於異說先生嘗論
朱子曰韓昌黎謂孟子之功不在禹下余亦謂朱子
之功不在孟子下也蓋當孟子時邪說詖行溺於人
心如楊墨之害仁義告子之食色言性鄉愿之同流
合污皆背先聖之道而馳者於是乎正之息之距之
放之雖以爲好辨勿恤焉若朱子時則世學不明異
端之蠶起尤甚學老氏者談道德而遁於虛無學浮
屠者談心性而流於寂滅他若王蘇之誇誕險詖陸
子之頓悟近禪凡爲吾道之害者幾幾乎淪肌浹髓
不可揀藥朱子辭而闢之日有孜孜心良苦矣朱子
之功直上躋孟子之列者也其崇信朱子如此嗚呼
先生之於道可謂不遺餘力者矣





竇靜菴先生


先生諱克勤字敏修號靜菴柘城人康熙壬子舉於鄉與耿逸菴湯潛菴兩先生講正學任泌陽教諭泌邑小而僻兵燹之後民鮮知學士習不振先生倣朱子白鹿洞規而擴之分立五社各置勸善規過簿月朔稽善過而勸懲之又立童子社少者讀孝經小學稍長讀五經性理人皆興行公餘擁書自娛餐粥不給晏如也戊辰成進士改庶常以內艱家居執經者接踵因念宋有四大書院中州居其二西曰嵩陽東曰應天耿逸菴已葺嵩陽而應天湮沒無可問深以

爲憾爰相基於柘城東門外創朱陽書院躬親課業
悉踵泌陽之法士崇實學者日衆服闋授檢討以疾
作乞假歸里殫力書院增其式廓爲經久作人之計
舊士重集新學踵至先生於侍親寢膳之餘優游訓
迪有終焉之志未幾卒所著有理學正宗孝經闡義
事親庸言尋樂堂家規泌陽學條規等書行於世

冉蟬菴先生

先生諱覲祖字永光號蟬菴中牟人康熙癸卯舉鄉
試第一雅志好古不汲汲進取而殫精著述潛心理
學登封耿逸菴先生特延主嵩陽書院先生昌明道
學著爲學大指十八則及天理主敬一圖以示生徒
問業者雲集一時稱盛辛未成進士改庶常官檢討
旋乞假歸里翛然寂處銳意實學時儀封張孝先先
生方闢請見書院延先生主教事相與闡明洛閩之
學壹遵程朱粹如也年八十有二卒於家所纂有五
經四書詳說及詩文雜著約二十種 朝廷遇有纂

修或就其家採擇云



洛學編卷之六

蘇門郭程先艾生輯

補編

宋

郭兼山先生

附子雍

先生諱忠孝字立之洛陽人受易中庸於程伊川學者稱爲兼山先生父達爲宋名將卒贈雄武軍節度使先生少以父廕補官舉進士不忍去親側多仕於河南筦庫間宣和中爲河東路提舉忤宰相王黼免靖康初召爲軍器少監入對斥和議爲非力陳追擊

之策謂兵家忌深入今日不能擊其歸他日安能禦其來復條上戰守十餘事不用改永興軍路提點刑獄及金人攻永興兵寡不敵或勸先生以監司出巡可以避禍先生曰吾世愛國恩義不容避朝廷祿養士人正以備不虞生平學力視此一日與唐經略重分城而守城陷死之贈大中大夫晁公武讀書志云兼山之學深邃自得世罕窺其奧窾其於易尤深明象數自謂得李挺之卦變論於陳子惠因亟讀熟玩有得焉著有兼山易解四學淵源論等書子雍字子和能傳其父學隱居峽州號白雲先生孝宗以守帥

薦旌召不起賜號冲晦居士命峽州歲時存問後更封頤正先生仍遣官就問雍所欲言備錄繳進年八十餘卒淳熙初學者集兩程子張子游定夫楊中立及兼山父子凡七家易說爲大易粹言行世今宋史藝文志止載兼山易解二卷四學淵源論三卷及郭氏傳家易說十一卷

郭程先曰伊川易傳之作爲一生精力所寄又言中庸一篇乃孔門傳授心法伊川之學於二書具見本末至象數之學則邵子所受於青州李之才者嗣後宗程者多言理宗邵者多言數兼山先生

以一人承兩家之學此誠洛學之的傳不愧爲見
知者矣且力阻和議卒至殺身成仁此其大節昭
然更足爭光日月子和能繼家學樂行憂違確乎
不拔亦豈空談性命者所可同日語哉
元

白崧谿先生

先生諱居敬字行簡河南登封人至元六年生甫六
歲喪母事父以孝聞及冠羣經諸子無不精究壬申
父卒殮殯一遵古禮年二十三州邑知其名咸備禮
幣請居講席多所開益以其居近崧潁間因自號崧

谿居士著書傳道遠方受業之士戶屢常滿如是者
三十餘年延祐庚申卒年七十有一學者尊之曰崧
谿先生生平不喜干人不言仕進仕亦不及然絕不
以山林自高甘守一貧儲無甌石晏如也論者謂其
清風苦節不以得失累其心處順安常不以窮約易
其素得朱子心傳著述千五百年後有堯夫天趣優
游三十六峯前蓋其實錄云所著有春秋正義尙書
新註易本義附說詩集傳附說四書集註附說周子
通書附說周子太極圖附說張子東西銘解義附說
小學書詳說道學發明理學詩說等書行於世

郭程先曰人知元有劉靜修之不仕其品獨高一
代而不知崧谿先生之節更有不可及者也夫以
教澤及人既不同山林之韜迹以著述傳後更思
延道脈於將來此其行誼誠不在靜修下而世或
稱此而遺彼豈不以靜修生有不忽木之薦死有
哈刺那海之刊刻遺書故其顯晦有不同邪茲特
表而出之使百世而下得與靜修同稱云

明

李公勉先生

附曾孫肖雲

先生諱敏字公勉襄城人景泰甲戌進士授監察御

史明習法律力革宿弊天順初奉勅撫定貴州蠻還
巡按畿內以薊州餉道經海口舟多覆溺建議別開
三河達薊州以避其險軍民便之成化初遷浙江按
察使尋以憂去讀禮之餘於縣西南紫雲山中建屋
數楹積書數千卷與學者講讀其中設置學田以供
膏火生徒雲集屋舍至不能容適侍御白公行中至
襄見其隘陋命有司改作之規模始大服闋歷山西
左右布政使擢都察院左副都御史巡撫大同大同
居極邊孔廟舊無雅樂以先生奏得頒賜令諸生以
時肄習風氣丕變三年召爲兵部右侍郎具疏請所

有不爲齋

建紫雲山學舍勅額詔賜名紫雲書院本部尚書余子俊怙汪直勢先生與議不合遂以病罷歸聚學徒紫雲山中朝夕講論取程朱及許魯齋薛敬軒遺書置於其中爲學者立其標準著爲條約期在躬行實踐而襄許之間彬彬矣乙酉河南大饑條上救荒數事詔以左副都御史巡撫保定旋改總督漕運上言漕政之弊由京通二倉官吏積取羨餘致虧正額而搬運守候費復不貲以故運卒逃亾大誤漕計請嚴禁革尋詔拜戶部尚書孝宗嗣位將耕籍田先生奏言農夫耕稼之苦非目覩不能悉知請於耕籍時增

置上中下農夫各十人服常服執農器引見行禮然後令其終畝賜酒食及布而遣之帝稱善從焉先是先生在大同見山東河南轉餉至者道遠多耗費乃會計歲支外悉令輸銀民輕賡易達而將士得以其贏治軍裝交便之至是並請畿輔山西陝西州縣歲輸糧各邊者每糧一石徵銀一兩畱其一本郡而以十九輸邊依時值折軍餉有餘則召糴以備軍興詔從之自是北方二稅皆折銀以災異乞罷因勸帝修德任賢優詔答之崇文門宣課司稅多爲勢要所侵漁先生因馬文升言請增設御史主事監視御史陳

瑤遂斥先生聚斂先生再疏求去帝降旨慰留之湖廣四川饑先生奏發帑賑濟帝悉從之時貴戚有隙地及鷹房牧馬場千頃者先生言畿內地先朝屢有禁令不許勢要請乞鷹房牧場止二百餘頃餘皆民產不可奪事並得寢當憲宗末中官佞幸多賜莊田既而得罪奪帝不以賦民令人守視先生請召佃畝科銀三分帝從之然他莊田如故也會京師大水先生極陳其害言今畿輔之內皇莊有五爲地萬二千八百餘頃勲戚中官之莊三百三十有二爲地三萬三千一百餘頃比來管莊官校率招集無賴號爲莊

頭往往豪奪畜產甚者戕殺人汚人婦女民心盡傷赴愬無所此災異所由生也且祖宗之世初無皇莊正統間以諸王未封供費浩大又爾時民稀土廣因相閒地立莊資用王既之國地仍歸官其後循襲遂有皇莊之名不知普天之下莫非王土若以此地爲皇莊則其餘獨非王土乎請盡革管莊之人賦民耕種畝概徵銀三分充各宮用度如此無皇莊之名而有足用之效至權要莊田亦請盡革莊役別擇佃戶年高有行者領之有司收其課聽諸家領取悅民心而感和氣無切於此時不能用南京御史之與蔣琮

相訐也咸被逮謫官而琮居職如故先生再疏力爭
不聽四年得疾乞休帝遣醫視療已復力請詔乘傳
歸未抵家卒上聞震悼贈太子少保諡恭靖曾孫繼
業字伯耀號肖雲嘉靖乙卯舉於鄉筮仕東鹿勸農
興學務本德禮以治民期年教化大行其事省郡監
司以義自處不爲彌縫嘗曰吾守聖賢之訓方寸自
有神明豈敢剝民奉上以一官頓喪生平乎久之諸
監司皆不悅遂投劾歸移家紫雲山中興復紫雲書
院課授生徒所立爲學程規仍以恭靖公遺教爲宗
而嚴密周備纖悉皆有成法人初疑以爲苦難已而

見其視聽言動必準乎禮從容順適若有餘樂始其
嘆服四方來學之士負笈如雲人以爲能繼祖風焉
郭程先曰魯齋早歲出入百家後從姚公茂得伊
洛之真傳遂成大儒其學術之醕出處之正卓然
無可議者至薛文清公承魯齋之家法衍程朱之
正脈固有明一代理學之宗也恭靖公以景泰五
年成進士又十年而文清公乃卒當其時知文清
者尙少而恭靖首爲尊奉表彰其書此其識見之
卓絕過餘子遠矣其後家學相傳三百餘年而理
學之風不墜不其懿歟

郭東野先生

先生諱朴字質夫安陽人性純孝年十四入郡庠時同邑崔後渠先生負時望鮮所許可見先生獨器重之嘉靖乙未成進士世廟奇其策對特命與鼎甲同梓時以爲異數授翰林院庶吉士尋改編修典修歷朝國史書成遷侍讀與修會典主試南北京闈所拔皆知名士歷陞吏部左侍郎銓選惟公遷南京禮部尙書加太子少保晉吏部尙書舉錯咸當世廟益委重焉癸亥以外艱歸於哀痛之中認取本性恍然見道之大原無不存於一心持此以印證六經千頭萬

緒皆有歸宿著九字圖說又著學約四思箴四畏箴皆切寔爲己之學服除補原缺旋加太子太保晉武英殿大學士嘗言相臣典機務功不必自己出當持其要以大權歸朝廷以盡職責庶司休休有容斯得古大臣體穆宗改元晉少保復加少傅先生感激圖報與二三元老協恭匡贊後以親老乞終養上勉畱不可乃先其請歸養十年母卒時先生年已七十餘居喪盡禮服闋年益高遂不復仕家居以讀易自娛不與戶外事有就而問學者隨其材質告以致力之方無不各得其意以去先生之學恪遵程朱嘗謂學

者為學當先除妄念妄念不起則理念自生此即吾
 心消長之機也讀書必求體驗有所得即筆之以備
 遺忘家居幾三十年後進之士多所成就一時尊為
 老成碩彥有司造廬請益於地方利病關切民生者
 無不披臆言之壽登八袞神宗遣使存問又三年乃
 卒訃聞上震悼輟朝贈太傅謚曰文簡所著續郡志
 姚江語商行於世學者稱為東野先生祀彰德鄉賢
 祠

大清

許酉山先生

先生諱三禮字典三號西山安陽人有至性甫十歲
 遭生母喪即痛切屏除葷酒順治丁酉舉於鄉辛丑
 成進士需次於家約鄴中士四十餘人立社講學以
 聖賢相砥礪名曰恒社蓋取有恒為作聖之基也癸
 丑赴京謁選日與賢士大夫問道講業而蔚州魏敏
 杲公崑山葉文敏公過從尤數初仕杭州之海寧適
 閩逆叛亂浙駐大兵凡資糧供億應給不暇先生咄
 嗟力辦而民不擾又於黃灣尖山等處築土城以防
 流寇練鄉勇嚴保甲浚城池百廢具舉民賴以安建
 海昌講院於邑中來學者踵相接先生悉教以明體

之學建告天樓於署後每日必焚香告天如趙清獻
故事辛酉擢御史建言漢儒董仲舒學術醇正其言
道之大原出於天與禪宗異學單主明心者不同故
宋儒程顥有儒道本天釋教本心之辨今宜照宋六
大儒從祀國學進稱先賢之例下九卿科道會議不
果行川提臣有請武官亦宜守制者九卿議武官無
丁憂舊制先生舉宋岳飛事以進言高宗紹興七年
飛聞訃請解兵權徒步歸廬山廬於墓側三年此往
代武臣丁憂之例也得 旨文武一體守制歷升太
常寺大理寺少卿戊辰十月充武殿試讀卷官旋升

順天府尹彈壓豪強不避嫌怨又請特設黑鞭以約
束旗廝遂爲定例己巳陞都察院左副都御史次年
陞兵部右侍郎因病疏辭 上不許先生乃力疾視
事辛未正月卒壽六十七歲著有聖學直指其大綱
在顧諟天之明命其條目在孝親忠君仁民愛物先
之以立志以奮於始繼之以受持以永其功而歸本
於隨念隨時隨事體認天理以要其成其言爲學之
法皆切實簡要使學者皆可持循又著聖學問答講
學會語讀禮偶見格物確旨等書行世其言治有匡
世良言保障教養十二政諸集後人總名之曰天中

許子政學合一書

李禮山先生

先生諱來章初名灼然以字行號禮山襄城人明恭靖公後裔生而穎異自知向學初授書卽日記千餘言年十五入邑庠時更制以策論試士邑前輩傅夢翁太守評其策云侃侃鑿鑿足覘胸中經術他日必爲名臣李氏自恭靖公後世以理學著稱中州先生爲肖雲先生曾孫於書無所不讀詩古文詞一學卽工旣而一切棄去專心於濂洛之書以興復先業爲己任就學於輝邑孫夏峯徵君與盩厔李二曲以正

學相砥礪康熙乙卯舉於鄉復受業於魏庸齋象樞之門庸齋有欲除妄念莫如立志之語因作書紳語略復與睢州湯潛菴柘城寶靜菴上蔡張仲誠往來簡札剖析經旨凡所持論總以不背儒先有益世用爲主嘗謂近思錄一書爲周孔真命脈學者不從此入手皆斷港絕流欲求入道難矣與登封耿逸菴中牟冉蟬菴同講學於嵩陽書院發明程朱之旨時孫夏峯徵君與耿誠齋諸人講學於輝之百泉書院兩河相望一時稱盛焉己朱太守璘聘主南陽書院作達天錄及南陽書院學規士習爲之日上旋以母老

謝歸增修紫雲書院讀書其中學者多自遠而至筮仕得廣東之連山瘴烟蠻雨獠狃雜居先是排狃負險跳梁提督殷化行討之反爲所乘事聞遣將分道會剿始就撫距公莅任甫隔歲耳聞者皆爲先生慮先生曰狃雖異類亦有人性吾當推誠待之乃仿王文成公遺意日延耆老詢疾苦招流亡勸之開墾薄其征賦復深入狃穴爲之置約延師務於至誠相感動創建連山書院著學規日進邑人訓教之而狃民之秀者亦知向學誦讀之聲徹巖谷制府中丞交獎曰忠信篤敬蠻貊可行信有徵矣己丑行取上官考

語謂有文翁化蜀之風壬辰補授兵部武選司主事監督北新倉革運官餽遺差竣引疾歸田相國從典少司馬李先復少司寇王企靖交章以真正實學可資大用保薦奉旨徵召先生力以疾辭遂不出嘗謂欲爲聖賢須從慎獨做起著衾影錄年六十有八卒於家陳大中丞裕門以先生與孫夏峯湯潛菴張敬菴耿逸菴冉蟬菴寶靜菴張起菴爲中州理學八先生增祀許州七子祠道光十四年栗樸園中丞題請列祀河南鄉賢祠部議遵旨以理學真傳褒之著書四十餘種其行世者有禮山園文集及連陽八

清學錄
卷之六
三
排風土記

陳元熙先生

先生諱愔字元熙新安人天性聰穎五歲入小學不爲兒嬉終日端坐不妄言及冠補博士弟子員讀太極圖說西銘有悟卽專意於性命之學檢身制行以孟雲浦呂豫石兩先生爲法開館授徒首重躬行又以前此藝文家爭爲新奇可喜之論每至悖謬朱註乃取大全蒙引存疑淺說諸書潛心體認其能得傳註之意者手自抄錄輯爲成書名曰四書認註說康熙癸卯舉於鄉甲辰成進士仍以訓迪諸生爲業聞

呂簡齋宗伯講學於宏運書院卽潔誠往謁簡齋深相得以爲深切爲己之學竟日談論娓娓不倦謁選得馬邑令邊陲殘破之境黎民彫敝幾不可爲前令率以因循從事相沿已久愈難振作先生莅任後招集流亡賑貧恤孤久之民無失業者興學課士彬彬有禮讓之風焉分校晉關簡拔稱得人以邑多逋欠終不可爲痛切白之上憲力爲蠲免請告歸里益殫心於聖賢之學癸亥主教高陽書院遠近之士就學問業者日益衆先生以平日所註理學諸書往復推論爲學者講授聞者無不欣然領會後以疾卒於家

詳見中州道學編

殷文介先生

先生諱元福字夢五新鄉人誕時父夢神語云當賜君五福兒因以爲名字通籍後因所居鄉名永城遂以永城爲號幼丰姿秀爽見者以爲奇童讀書十行俱下七歲讀小學近思錄欣然樂之凡所舉動卽以爲法父卒家徒四壁立嘗借書依母紡車前假餘燭光終夜朗誦爲文力追先正不逐時趨年二十始入學康熙癸酉鄉舉第一明年成進士選翰林嗣莅廣西之柳城重農課士於邊鄙地行鄉飲及賓興禮雍

然可觀劄纂邑志四載以艱歸服闋補江南武進縣吏胥慢易書生捧牘嘗試先生咄嗟裁決咸驚服兩江有神明之頌攝無錫篆謁東林講堂拔識名宿鄒升恒輩一時以爲知人解組後值朱相國軾撫浙延主敷文書院明體達用人材奮興人呼爲小白鹿洞主平氣節自命設施皆本實踐精研周易詮發圖書太極之旨垂老不忍釋手所著有寓理集其大旨尊崇程朱糾正陸王過當之處以求歸於一是附史斷數十則詩出入唐宋大家有候鳴集知非草讀易草等集行世年六十四卒於家學者私謚曰文介先生

吾鄉睢州湯文正公親受業於孫蘇門先生爲
中州大儒並先後奉

上諭崇祀

文廟固非一鄉一邑所得而私也顧後生耳濡目染
言動必法鄉先生近聖人之居親炙尤切焉乃
公全書舊本漫漶就中洛學編一冊爲尤甚洛
學編者公受命於孫先生纂中州先賢先儒姓
氏里居行誼著作以詔後生者也後生此編不
覩先賢先儒茫不知何人又焉能鼓舞奮興以
紹往哲之遺緒哉焯家商邱與公同郡自孩提

奉教父兄竊願私淑者有年矣今倖通籍官京

師欲先刊此冊與計偕諸君子攜歸里門以廣

其傳未果適謙齋叔父守天津有同志捐俸付

焯成之爰於道光八年十一月開雕其明年二

月工竣除印送若干部外板存琉璃廠某齋中

聽有志者刷讀而誌其顛末如此抑焯尤有望


者洛學編公全書之一種耳刊此編不刊全書

力不逮也且編中所載如薛敬軒先生讀書錄

河洛集冉蟬菴先生五經四書詳說及吾孫先

生中州人物考等書皆理學正宗不能一一付

梓不無望於來者至博陵尹公續洛學編已附
刻正編後計自乾隆三年距今又九十餘年矣
名賢繼起不絕倘能廣搜博採總核名實再纂
成編以繼博陵之志表彰前徽嘉惠後學厥功
非淺鮮也又豈獨中州幸與區區私衷實冀於
此故於書後而縷述之道光九年二月望日同
里後學陳焯謹誌



71014659

